



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 8

Linük tia melenshitsu atema shisaliok dak tashi lir: PM Modi

Japan Open: Lakshya Sen semifinal nung tsükogo



VOL. XX NO. 287 (ADOK 287) DIMAPUR AMUNGNÜ (SUNDAY) CHITENI (JULY) 30, 2023 ₹ 5.00

Tenük wara nungi jenbua alitsu metetdaksür

Dimapur, July 29, 2023 (TYO): Linük nung conjunctivitis (eye flu) mesüra pink eye ta ajaba wara kanga prokshiba osang lir ta Nagaland Health & Family Welfare Department-i metetdaksüogo.

Conjunctivitis (eye flu) mesüra pink eye ta ajaba wara ajanga tenükjang meketa aliba wakdaksür aser iba ya allergy mesüra virus ajanga adokdaksür, ta Principal

Director Dr. Vibeutounuo Sachu-i sangdong ka nung ashi.

Conjunctivitis (eye flu) ya melamela menateper. Anungji teka junga metsüksüba den temang merükmejua ayutsüla. Tekamemetsüki tenük nung mekongshitsüla aser towel, lens mesüra glass melentepa mamshitsüla, ta Principal Director-isa iba wara nungi jenbua alitsu metetdaksüogo.

CPO-i Kuki lennirtem den ajuruteper

Dimapur, July 29, 2023 (Agencies): Manipur nung Kuki aser Meitei nung tsungda ken o angatetpedaksütsü mechi nung Chakhroma Public Organisation (CPO)-i Kuki nung lennirtem den senden ka menogo.

Honibarnü SPO-i Chümoukedima nung Chakhroma telongtet nung aliba Kuki yimtsungtem nungi lennirtem den senden amen aser idangji Kuki o Meitei nung tsungda tangatetep kati arutsü mepishi.

Manipur nungi Kuki nung aser Meitei nung tsungda tangatetep kati arutsü mepishi.

jenoka lir aser June ita CPO-i parnok nem relief materials agüja yariogo ta president Zhatu Kimho aser joint secretary Thejangukho Yalietsu nati sangdong ka nung ashi.

CPO-i nungdakbapurtem kodang südir süaka akokba tashi teyari agütsütsü aser onok den külemi amalitepa inyaksangshitsü ayongzüker ta parnokisa metetdaksü.

July 31, 1995 nü CPO-i Chakhroma region nung alir ajak den tangatetep nung alitsu bangzungtepa aliba ama maneni liyonga aotsü ta ktdangpurtemisa ashi.

NEA-i NEP 2020 atema sentong agi

Dimapur, July 29, 2023 (DPRO): July 29, 2023 nü Nagaland Education Association (NEA)-i National Education Policy (NEP) 2020 indang sentong ka ayonga agiogo.

Iba sentong ya Morung Hall, Directorate of School Education, Kohima nung agi aser NEA President Dr. Zavise Rume-i NEP indang maparen tajungba nung angatetpsü atema iba sentong ayongzüker ta ashi.

NEP 2020 nung lateta aliba alizungtem Nagaland-ia kodaser tongteta inyaksü ta asüba tangatetbatem lemsatepsü atema iba sentong ayongzüker agi ta paisa ashi.

system tajungba yanglushitsü atema renemba lir aser iba ajanga linük melenshitsu ta Rume-isa ashi.

"Nübertemi education system tasen ka meshiba ama NEP 2020 renemogo aser iba ya practical, job-oriented aser skill-oriented lir. Iba ama education system ka ajanga tanur nem practice aser experience ajanga sayutetsü" ta paisa metetdaksü.

Iba sentong nung panelist temji- Associate Professor Department of Education, Nagaland University, Dr. Khotole Khieya; Associate Professor, SCTE, Dr. Bendangyapangla aser Deputy Director of Higher Education, Dr. Medonggoi Rhakho nung liasü.

COCOMI-i special session alitsu akhanger

Imphal, July 29, 2023 (Agencies): Coordinating Committee on Manipur Integrity (COCOMI)-i July 29 nü Imphal nung Narco-Terrorism indang sentong tulu ka ayongzüker agiogo.

Iba sentong nung kin aika aden aser Imphal West District nung aliba THAU ground nungi sentong tenzüka liasü.

Manipur MLA temi August 5 nung mesüra matongdang state assembly indang special session ka jazüka Manipur litsü kümzüka ayutsü bangzung ka magira MLA tem anema mapa inyaksü ta tanü sentong nung adenertemi telemtetba agi.

Lungkak aita sentong nung adenertemi Narco-Terrorists aitsüba, telungpurtemi Manipur litsü agitsü merangba, India aser Manipur sorkartemi Kuki telungpurtem den SoO agreement anemba aser Manipur nung ktdangsubaren balala asütsü akhangba aija yimyim ayim.

Iba sentong nung adenertemisa Prime Minister Narendra Modi-i ola madokba aser Manipur Chief Minister N. Biren Singh-i mapa meinyakba aitsü.

Parnokisa Separate Administration anema noktaksü aser NRC mapa inyaksü telemtetba agi.

Opposition teloktep I.N.D.I.A MP temi Manipur semdang

Imphal, July 29, 2023 (Agencies): Opposition teloktep I.N.D.I.A nungi MP 21 adenba telok ka Honibarnü Manipur tonga aruogo aser parnoki tanü Churachandpur jila semdang.

Honibarnü I.N.D.I.A MP temi Kuki lennirtem, civil society zungsemtem aser relief camp balala nung alirtem den ajuruteper. "Nisungtemkanga tsübuteper aser nisung shinga den-a mejeminür. Iba sorkar yagi parnok nem teyari kecha magütsütsü ta meteta lir" ta Congress lennir Adhir Ranjan Chowdhury-i relief camp ka semdangba sülen ashi.

"Centre sorkari CBI nem bushisungdang südaksütsü jembir. Tanü tashi Centre sorkar mejanga liasü asü?" ta pai asungdang.

"Onoki kin anaprong nungi nisungtem den ajuruteper jembitsü. Nisung ajak indang ola angatsü. Onoki Kuki aser Meitei nung den jembitsü" ta TMC

lennir Sushmita Dev-ia ashi. Opposition MP tem tanü Imphal atong aser iba sülen helicopter ana nung Churachandpur-i ao.

"Onoki yangi relief camp nung nisung aika den ajuruteper aser parnok indang khurettem angaogo. Onoki parnok dang tensa melenshitsu aser iba atemaji inyaker ta shiogo" ta Churachandpur district nung relief camp ka semdangba sülen RJD MP Manoj Jha-ia metetdaksü.

Opposition MP temi Deobarnep Raj Bhawan nung Governor Anusuiya Uiquey den ajuruteptü aser Manipur tensa süngjemdaksütsü atema jembitsü.

Deobar anungdang parnok Delhi-i meyipa aotsü aser iba sülen Centre sorkar nem parnoki bushiteta osang agütsütsü.

ITLF-i President's Rule akhanger

Külen, Indigenous Tribal

Leaders' Forum (ITLF)-i Indian National Developmental Inclusive Alliance (I.N.D.I.A.) MP tem dang Manipur nung lisopurtem asoshi ktdangsubaren balaka tenzütsü aser Centre dang President's Rule benoktsü atema tayongzüker agütsü.

Iba rara nung telok anaprong takoksa nguogo saka nübo agi tangar memenep Kuki-Zo lisopurtemi takoksa tuluba ajuruteper ta ITLF-i opposition MP nem agütsüba shidi nung shia lir.

"Manipur nütsung yongsük nung onok 16% dang lir aser tesem tulu ka nung onok prokshia alir anungji nütsung yongsük 53% ajanga onok samatsütsü lendongbang nung lir. Parnoki state sorkar aser police aziüka lir" ta ITLF-isa ashi.

Manipur nung military buffer zones nung tashiyim inyaker aser President's Rule maliba agi Army aser tang security forces-i mapa meinyakteter ta parnokisa ashi.

Advisor Zhaleo-i East Dimapur Town Council office lapoktsü



Advisor Zhaleo Rio aser Advisor Hekani Jakhalu na den Dimapur DC aser EDTC Administrator nung Purana Bazaar nung EDTC office ki lapokba sülen agiba noksa angur. (DPRO Dimapur)

Dimapur, July 29, 2023 (DPRO Dimapur): Honibarnü Urban Development and Municipal Affairs Advisor Zhaleo Rio-i East Dimapur Town Council (EDTC) Office, Purana Bazaar lapoktsüogo.

Iba sentong nung Industries and Commerce Advisor Hekani Jakhalu aden.

"Sorkar ktdangsubaren tajungba akümtsü ta election nung nangzüker ama inyaksü" ta Zhaleo-i o jembidang ashi.

"Dimapur district nung tzungluruwa mapang tzümetsung timtem ajuruba dena tayongzüker jenti ajurur. Iba atema nübertem dak pei temeket jungjunga anepaluba den jana timi endoktsü tangatetba alitsu nungdaker kechiyong Municipal Local body ajanga dangbo jana anepalu mesüteter. Anungji kilen shiai jana timi endoktsüla" ta pai ashi.

Nagaland nung Urban Local Bodies (ULBs) 39 lir saka ULBs 20 nung nütsung yongsük ajemba den dokan o office peria

maliba ajanga mapa inyaksangshi mesüteter, ta Zhaleo-isa ashi.

"EDTC administrator aser ADC Dimapur Mhalo Humstoe lenisüba kübok senotsü timi amshia ki yanglutetba atema tenütsang agütsü. ECTC nung tanishir tajung lir aser iba ya Nagaland nung tanga ULBs atema tatishitsü tajung asütsüla" ta paisa ayongzüker.

"Sorkari Urban Local Bodies (ULB) tebilemtsü ya tekaraba nung angatetep ULB elections aginür. Iba atema sorkari sendaktepa alir ajak den jembidar saka Supreme Court nung ken o metembang lir. Supreme Court-i lemte ka agiba sülen ang state sorkari iba atema mapa inyaksangshia otettsü" ta Advisor Zhaleo-isa shisem.

Nagaland nung ULB Elections magi tashi Administrators-i ktdangtsütsü sorkari tashi agüja lir, ta paisa ashi.

Paisa Dimapur NDPP MLA tem- Hekhani Jakhaku aser Moatoshi Longkumer aser teyariteper BJP MLA tem dang

Dimapur renloktsü atema mepishiba metetdaksü.

"Nisung ajaki Dimapur sakloker saka memeimer. Dimapur ya Mini Nagaland lir anungji asenoki Dimapur tajungba kümdaksütsü aser talisa sanitation/waste management maparen shitak inyaksü merangdi" ta Zhaleo Rio-isa ayongzüker.

"Tashi den külemi tebilemtsü aser teinyaksü dena lir. Anungji East Dimapur Town Council lennirtemi nübertem tenzüker mapa shitak inyaksü ayongzüker" ta Industries and Commerce Advisor Hekhani Jakhalu-ia ashi.

Iba sentong nung mendenji EAC, Dimapur, Imlijungla liasü, Rev SN Lotha-i temoatsü meshia sarasadem aser ADC & Administrator, EDTC, Mhalo Humstoe-i tesentepertem pela agizük.

Sentong nungsa Purana Bazar Tribal Council chairman Tohoshe Awomi aser Dimapur Deputy Commissioner Sachin Jaiswal nati o tatsütsü jembia.

CPO-i coordination senden ka ayongzüka menogo



Chakhroma Public Organisation (CPO) aser Chakhroma litsü telongtet nung aliba Kuki yimtsüngtem nungi lenirtem senden amenba sülen CPO Hall, Chümoukedima nung noksa tangokba yangi angur.

Chümoukedima, Chiteni/ July 29 (TYO): Chakhroma Public Organisation (CPO)-i ayongzüka July 29 nü CPO Hall, Chümoukedima nung Chakhroma litsü telongtet nung aliba Kuki yimtsüngtem nungi lenirtem den senden ka menogo.

Senden nung onük balala benoka sensaksemogo, kong Manipur nung Kuki nung aser

Maitie nungertem mangatetep adoker aliba indang densema liasü. Senden nungsa iba mangatetep ya takaratiba nung bentettsü atema mepeshia liasü.

Senden nungsa Chakhroma litsü telongtet nung aliba Kuki nung yimtsüngtem nung Manipur nungi jenshia aoba Kuki nungertem noklang aika jenoka lir aser CPO-i June tetenzüklen parnok nem teyari

agütsüogo, ta metetdaksü.

Maneni CPO-i, takokba tashi nungdaka alibapurtem nem teyari agütsütsü nangzükba den parnok dang teka amteper inyaksangshitsü mepeshia liasü. House-isa, 1995 kum July ita 31 nü nangzüktepbä ama Chakhroma litsü telongtet nung ajak tangatetep nung aser tesendaktep akangshia liteptsü maneni bangjema liasü.

Dimapur nung World Day Against Trafficking in Persons sentong agiogo

Dimapur, Chiteni/July 29 (TYO): July 29 nü Prodigals Home Fellowship Colony, Dimapur nung World Day Against Trafficking in Persons sentong agiogo. Iba sentong ya "Reach Every Woman of Trafficking: Leave No One Behind" omen nung ajemdaker agia liasü.

Sentong nung Legal cum Probation Officer (LCPO) Moajungla-i onük dak sendaka aliba ken o balala indang aser trafficking dak sendakba nung service balala aliba indang lemsatop. Laisa, Nagaland ya India nung meimchir shibelenba tetenzükdak tesem tongti ka ta züנגshir aser sensak tia aser mapa inyaksü asoshi maongka maliba ajanga North East tesem ya shibelenertemi maongka agia inyaksangshitsü lendongbang nung lir, ta ashi.

Report ajang ashiba agi, nisung samartem ya shilem 83 bo arishi kum 18 tekübok alirtem lir aser Nagaland nung shilem 13 bo meimchir shibelenba dak sendaka lir. 2015 nungi 2021 kum

tashi nung nisung 28 kumzükogo kong tetsür 26 densema liasü. Iba amala mapa benoka inyakeremi yagi onsite recruitment aser social media ajanga itasen tajung agütsütsü nangzükter hotel, parlor, aser spa amala industry tem nung inyaksü atema nüburtem atsüa arur. Parnok mapa tembanga inyakba sülen item nisungtem yagi parnok indang websites aser account tem ajak delete süa parnok inyakyim ajak aitoker.

Kasa mapang nung yimdak yimtsüngtem nungi jila aser yimti balalai maongka tajungba bushia aoba, mapa manguba, sensak tia, kaketshisatsü peria maliba, temesepta chiyongtsü achiba, kidang nungi jena aoba aser ki makaba tanurtem, tekelok shisatsü meshidakba, teküp ayokba, cheap labor & sex, human rights protection maliba, mangatetep, natural disasters amala ajanga meimchir shibelenba tali küma odaktsür.

Item nisungtem ya yimya agi kanga jenjang tamajung nung alir

asir iba den chiyongtsü shidak mangur, reshikangshia amshir aser healthcare temeden dena magütsür. Maneni parnok temang nung tenük telen balala agizüka yoka achitsüa ana nung lir aser kangshia teküp yoka senzüba nung shilem agidaktsür.

Moajungla-isa, timtem tekangshia ajangshirtemi aakba, tangari mesenmetui amshitsü tsübuba, tetsübu, taoksa aser amokmerenba ajanga parnok dak atalokbatem indang osang magütsür aser iba ajanga timtem ya azioktsü asoshi tetsükdaktsü adoker ta ashi.

Iba sentong ya EAC (Sadar) Dimapur District Khiuzan Kaurinta lenisüba nung agi aser onük balala dak ajemdaker nisung balalai o jembia liasü.

Maneni iba sentong ya Childline, Dimapur den longjemer Dimapur District Administration and District Hub for Empowerment of Women, Beti Bachao Beti Padhao, aser Sakhi-One Stop Centre (OsC) nung longjemer ayongzüka agiogo.

Army recruitment rally ka Sept. ita agitsü

Dimapur, Chiteni/July 29 (TYO): Indian Army-i Agniveer Recruitment inyakyim mezüngbuba shilem tembanga agiogo, kong 2023 kum April 17 nungi 26 tashi online Common Entrance Examination (CEE) ka agiba densema lir.

Online CEE nung takok anguba candidate tem indang result "JOIN INDIAN ARMY" website nun 2023 kum May ita atoktsüogo aser tatidang ajanga shimba candidate tem nem parnok indang registered email address tem ajanga osang agütsüogo.

Recruitment inyakyim Recruiting Office, tanabuba shilem 2023 kum June ita nungi linük kübok tesem tongteprateptettsü.

balala nung tenzükogo. Nagaland nung aliba candidate tem atema recruitment rally ka September 13 aser 14 nü Rangapahar, Dimapur nung agitsü renema lir.

Rally nung candidate tem km 1.6 asemaktsütsü aser iba den basic physical fitness, measurement, aser medical examination densema alitsü.

Candidate shinok Phase II atema Admit Cards nguogo, parnoki osang tejangja agitsü atema email (swarkokila@nic.in) or mobile (8974958673) ajanga Army Recruiting Office, Rangapahar, Dimapur den tongteprateptettsü.

Abiogenesis-i mapang ka nung ken ana sayaogo



Dimapur, Chiteni/July 29 (TYO): Abiogenesis-i, 'Let's Do Something' aser 'Züp Züp' ta nungja agütsür July 29 nü alima ajunga nung ken ana sayaogo. Ken ana ya Spotify, Apple Music, Amazon Music, Deezer amala sabangtem nung alitsü aser stream asütsü angütsü.

Tzü mopung melenshiba ya meimchir ajak atema shingai nonga ta meshitetba amokmeren ka lir. Tzü mopung melenshiba ajanga timtem adokba ajangshia aruda aser tang jenjang magira timtem tului aitsü.

'Let's Do Something' ken ya alima nung tang tzü mopung melenshiba indang ka lir aser iba ken ajanga Abiogenesis puri parnoki akokba yari ajak dang longjemer iba mimchir inyakyim

ajanga adokdaksüba timtem ya nokdangtsü atema ayongzükter, kechiyong temelenshi ajak tera ya meimchirtem lir.

Kasa mapang nung 'Züp Züp' ya instrumental piece ka lir, kong au agi yangluba kongi koba dang Bamhum ta ajar iba ya kongki ajak rongnung tongtiba süa amshir. 'Züp Züp' ya Ao oshi nung ojang ka lir koba temesünger oshi nung 'tiptop' asütsü.

Iba ken nung Arenla Subong ya kentener aser Bamhum atemer lir aser tanungba instrument ya Moa Subong-i atemer aser paisa backing vocal atemer.

Maneni Abiogenesis puri taküm kum tatemlen kensep ka sayatsü renemdar, kong ken tapu balala mejemer atenba angashitsü.

Churachandpur nung angadi medical camp ayongzüka kaogo



Churachandpur, Chiteni/ July 29 (Agencies): Rural Women Upliftment Society-i ayongzüka, Churachandpur, Manipur nung anogo ana angati medical checkup camp katsüogo.

Iba camp nung Manipur nung mepetmesü tulu adokba ajanga

jenshir alir shirnok camp balala nung jenoka lir, parnok 226 nem kanga dang nungdaka aliba healthcare service agütsüogo. Iba camp ya Action Aid-i teyari agüja ayongzüka agiogo.

Rural Women Upliftment Society Secretary, Mary Beth Sanate-i ashiba agi, "mepetmesü

agi kongshir alirtem atema onoki aria bilemstür aser pei talidak toktsür jena orr alirtem atema medical teyari koda tongtibang aji onoki reprangteta liasü. Item nisungtem yagi timtem tekangshi aika ajangshio aser medical tsütsü teyari angütsü atema parnok asoshi kanga

tasak kumogo. Iba camp ajanga nungdaka aliba nüburtem nem teyari agütsütsü onok nükjidong lir."

Iba camp nung gynecologist ka, pediatric doctors ana densema doctor pezüi temang tendangi arurtem nem teyari balala güja liasü.

Medical team yagi temang manemi alir 132 anpalutsü iba den tetsür 37 nem specialized gynecological services agütsü aser tanur 57 temang anepaluja liasü.

Rural Women Upliftment Society-i taoba mapang July 3 aser 4 nü camp ayongzüka agiba mapang shiranger 825 temang anepaluja liasü aser iba ajanga pei talidak toktsür jenshia orr alirtemi medical teyari nungdakba sayur.

Action Aid, ADRA aser For One Life nungeri teyari agüja iba lokti tentet yagi Manipur nung kin o kin na tsüנגda mangatetep adokba ajanga kanga mejungi kongshir alirtem nem maneni tenüנגdakba teyari agütsütsü asoshi bendanga agütsür lir.

Item medical camp tem ya temang anepalutsütsü atema dang masü saka iba ajanga mepetmesü agi kongshir alirtem ajungkettsü aser parnok nem teyari agütsütsü atema lokti ajunga longjemba sayur. Aria bilema Rural Women Upliftment Society-i maneni item nisungtem nem teyari agütsürdar aser iba ajanga timtem tekangshi mapang parnok nem timla agütsür.



July 29, 2023 nü INDIA teloktep nung opposition party balala nungi MP tem New Delhi nungi Manipur-i aotsü lia airport nung tangokba noksa nung angur.

Linük tia melenshitsu atema shisaliok dak tashi lir: PM Modi

New Delhi, Chiteni/July 29 (Agencies): National Education Policy tenzükba sülen küm asem ajungba anogomong nung Honibarnü Bharat Mandapam, Delhi nung Ato kilonser, Narendra Modi-i 'Akshil Bhartiya Shiksha Samagam' ta ser educational convention ka tenzüksüogo.

Iba sentong nungji Ato kilonser Narendra Modi den Union Education Minister, Dharmendra Pradhan densema Union minister tem- Annapurna Devi, Subhas Sarkar aser Rajkumar Ranjan Singh nunggera aden.

Ato kilonserisa tanurtem den sensaksem aser tanurtemi renemba projects repringdanga liasü.

Iba sentong nung jembidang Modi-i, National Education Policy (NEP) ya ajanga Aso 21buba India nem lenmang tasen

agütsüsü, aser tarutsü India yangertsü atema tamendakdak yangluba nung asenoki-a shilem agir, ta metetdaksü.

Paisa, linük tia melenshitsu atema shisaliok dak tashi keta lir, ta ashi.

"Asen linük tia melenshitsu atema shisaliok dak tashi keta lir. Asen linük jajaba lenmang nung alizüngtem tongtettsü atema shisaliok ajanga tongtibang shilem agitsü. Iba nungji na-a densema lir. Akhil Bhartiya Shiksha Samagam nung shilem agitsü atema ni-a maongka anguba atema pelar," ta pai ashi.

Ato kilonser mangdang kübok 2020 küm NEP tenzükba liasü; iba ya tarutsü nung tayongzükba balala koktettsü atema lanurtem renemtsüsü nükjidong nung tenzük.

Anogo ananü sentong ya July 29-30 nung agir aser item

sentong nung shilem agitsü atema shisashirtem, sector balala nung mongintem, yimsüsürtem, industry ktdangsertem, tesayurtem aser schools, higher education den skilling institutions balala nungi kaketshirtemi maongka angutsü.

Parnoki tebilemba balala lemsatepba den külemi takok anguba otsü lemsatepsü aser NEP 2020 tajungtiba nung mapa küma inyaksü atema asalentong yanglutsü.

Akhil Bhartiya Shiksha Samagam ya shilem 16 lemsar agitsü aser omen balala nung o lemsatepsü. Omen rongnung 'Access to Quality Education & Governance', Equitable & Inclusive Education, Issues of Socio-Economically Disadvantaged Groups, National Institute Ranking Framework aser Internationalisation of Education densema lir.

CBI-i Union Ministry ktdangser aseme sübokrem agiba atema apu

New Delhi, July 29 (Agencies): Honibarnü Central Bureau of Investigation (CBI)-i sübokrem sen lakh 3 agiba ken o dak sendakba nung sorkar ktdangser asem den tangar ka densema puogo; ktdangser aseme Ministry of Corporate Affairs (MOCA) nungi lir.

CBI ktdangsertemi tai tonglokja alir ktdangser asem ket nungjagi sen lakh 60 apu.

Ktdangser asem nungjagi ka Director General office, Ministry of Corporate Affairs (MOCA) nung Joint Director aser ka New Delhi nung aliba kasa ministry office nung Senior Technical Assistant

inyaker. Ano ktdangser ka MOCA nung Director saka tang Chennai nung aliba Corporate Bhawannung Official Liquidator teinyakdak liasü. Tanungba nisung kaji Mumbai nung aliba nija company, Alok Industries nung inyaker.

Sorkar tenzükertem jagi ochimashi mapa inyaka nüburttem dang nungi sübokrem agir, ta parnok nem tai tongloktsü.

July 28 nü parnok anema tashishiba ken o agütsüba sülen CBI-i parnok jakdaka aputsü atema asalentong yanglua liasü; yamaji Joint Director-i sen lakh 3 sübokrem agizükba mapang

nung CBI ktdangsertemi pa jakdaka apu. Iba sülen tanungba ktdangsertemjia apu.

Joint Director, Manjit Singh aser Senior Technical Assistant Ruhi Arora na ya Delhi nung aliba MOCA office nung Director General kübok inyaker. Puneet Duggal ya Chennai nung MOCA Joint Director inyaker aser Reshabh Raizada ya Mumbai nung aliba private company 'M/s Alok Industries' nung inyaker.

CBI-i nisung pezüji apuba sülen Delhi, Gurugram aser Chennai nung tesem balala mita aoba mapang nung sen lakh 59.80 den tashishitsu kaketterem aser digital kuli aika ngutetogo.

ST. EDMUND'S COLLEGE, SHILLONG

Vacancies for various positions (Private Posts)

- Counsellor (One)
- Psychology (Two Teaching Positions).
- Computer Application (One Teaching Position)

Kindly apply at the earliest by visiting.

Website : <https://sec.edu.in>

TN nung firecrackers godown ka apokba lendong nung nisung 8 asü

Krishnagiri, July 29

(Agencies): Honibarnep Tamil Nadu kübok Krishnagiri district nung firecrackers yangluba factory godown ka nung firecrackers apokba lendong nung nisung ti asü aser aika yiruogo, ta police-i metetdaksü.

Osangbener den jembidang Krishnagiri Superintendent of Police, Saroj Kumar Thakore-i, Pazhayapettai kiyong nung aliba firecracker factory kiburji Ravi lir, ta metetdaksü.

Godown arongba dang masü saka anasa aliba dokan aser ki-a aika arong.

"Police aser fire personnel aika iba tesem jagi aoba sülen

kümzükba maparen inyaka liasü. Iba lendong nung nisung tenet asü aser aika yirua anasa aliba sorkar hospital kati anir ao," ta police ktdangserisa metetdaksü.

Tesülen police-i, kasa lendong nung yirur ka mekümzükteti süogo, ta metetdaksü.

Iba lendong nung yirurtemji Krishnagiri Government Medical College Hospital-i anir oa treatment agidar.

Anogo ishika tejaklen Tamil Nadu kübok Virudhunagar district nunga firecracker yangluba factory ka nung firecrackers apokba lendong nung nisung ana asü.

Manipur onük nung Supreme Court aitsüba atema kaketzülur ka apu



(Agencies): Manipur tensa dak sendakba nung Chief Justice of India (CJI) aser Supreme Court aitsüba atema yimtenren dak sendakba ocet zülur, Badri Seshadri puogo.

Manipur nung raraba ken o ka angadanga mapang court tetuyuba ka dak sendakba nung pai YouTube video ka ajanga CJI aser Supreme Court aija liasü.

Honibarnü Berambalur police-i, pai lokti tsüngda tsükchitep ajungkettsür, ta tai tonglokja apu.

Osang angazükba agi Katur yimyak nungi lawyer, Kaviyarasu-i Tamil Nadu nung Perambalur district kübok Kunnam police station nung Badri anema ken o benoka liasü.

YouTube channel nung interview ka nung jembidang Badri Seshadri-i, "Supreme Court-i sorkar dang, nenoki kecha meinyaktetra onoki (Supreme Court) inyaksü ta ashi. Asenoki Chandrachud (Chief Justice of India) nem prangpong ka agütsüdi aser pa yangjagi (Manipur) yokdi. Pai yimjung bener arutetli sü marutetli repringdangdi," ta jembia liasü.

Badri Seshadri-isa, "Iba tesemji tenem lima lir aser yangji nisungtem tepsettsü. Raraji

jembia liasü.

Manipur nung May 4 anogo nung lokti kati tetsür ana mangsa anir senzüba video ka temai adokba prokshiba sülen Supreme Court-i Centre sorkar dang tim mera agia inyaksü tuyua liasü.

Iba mapang nungji Chief Justice of India, DY Chandrachud-i, "Onoki sorkar nem mapang tatsüka agütsür, mesüra onok tiyongtsüi aita inyaksü," ta metetdakja liasü.

Badri Seshadri anema Indian Penal Code (IPC kübok Arrla 153 (rara adokdaksütsüsa jembiba), Arrla 153 A (tamangba yimsü, kin aser oshi nung ajemdaker telok balala tsüngda tsükchitep ajungkettsüba) aser Arrla 505 1 (b) (nüburttem aoksadaksütsüsa inyakba aser lokti nung petsaperong adokdaksütsü atema linük anema inyakba) nung ajemdaker ken o benok.

Badri apuba aija Tamil Nadu BJP Tir, Annamalai-i twitter ajanga, "Tanep Tamil Nadu police-i kaketzülur aser o jembir nungtuugu, Badri Seshadri apubaji Tamil Nadu BJP-i sashia aitsür. Ochimashi DMK sorkari nüburttem timtem merepranger saka nisung ang apur. Ochimashi DMK sorkar atema mangyangtsütsüji Tamil Nadu Police mapa asü," ta metetdaksü.



July 29, 2023 nü Bokaru district nung electric light inzü tokdang tsükba lendong atalokba sülen iba tesem nungji nisung adenshia aliba noksa nung angur. Iba lendong nung nisung pezü asü.



TIR YIMYIM

YIMOBILEM (EDITORIAL)

DIMAPUR AMUNGNÜ, CHITENI(JULY) 30, 2023

Tsüngrem meimba mulungjang

Asenoki inyakba mapa tajung aser asenoki agütsüba tenla tulu kecha agia Tsüngrem meimba mulungjang melena meinyaktettsü. Nisung mulungjang nung temeimbo mali saka tema tazütsü agi Tsüngrem tenüng nung temeim mapa amato inyaka sayutsüa akok. Iba amaji akhi mapang nungi tanü asenok tendak tashi nisungtemi Tsüngrem tsüngdang inyaka arur. Tsüngremi anüng aser alima aser yangji aliba kechisarina ajak yanglu, anungji alima aser anüngdak akaba kechisarina ajak ya pa meyong lir. Aiben asenoki ibaji mebilemdangi asen akaba nungi teraka tenla agütsüba aser mapa tajung tilaka inyakba jagi Tsüngrem talila akatsü amai bilemer. Ajisüka, Tsüngrem asoshi aseni rongsen tenla agütsüba aser tema tazütsü agi mapa tajung inyakbatemji menüngdaker saka Pai asen mulungjang ajak agi Pa meimdaktsüner. Iba jagiang, Paul-ia mapa tajung tulu inyakba aser tanüla oshi nung shina jembiba agi masü saka asenok dak Tsüngrem meimba molungjang alitsübjang ajak dang tongtibangba ta 1 Korint 13 nung shia aliba asenoki azünger. Iba tapu nung temeim indang ashiba ya, asenoki tenüng tajung agitsü atema temeim mapa inyakba aser teyari agütsüba ya masü saka asen mulungjang ajak agi Tsüngrem meimba temeim indang ashir. Atangji Paul dak tenem ajungdoktsüsa tamang tulu liasü saka kodang pai Tsüngrem tenzükbä mapa nung tensa tia tajung aser tamajung ajak ajurua ao, idangjiang pai pa dak tanüla sempet aliba ajak to tongtibangba masü saka pa mulungjang nung atangji agi Tsüngrem meimba shisatsü adenbajang ajak dang temaba aser tongtibangba ta angatet. 1 Samuel 15 nung asenoki Saul Chubai Tsüngrembo memeim ser Pai ashi angaa inyaker külenang ano Pa peladaktsütsü asoshi inyaktsü pa mulungjang nungbo bilemer ama inyakba asenoki angur. Ajisüaka, Tsüngremi Saul bang nungi adokbaji masü saka pa mulungjang nung bilembaji dang azüng aser agi. Iba tatalokba nung Samuel ainker ajanga Tsüngremi tenla agütsüba nung masü saka tashi angaba nung dang pelar ta shia angutsü. Aji oda, tashi angabaji temulungjang nung temeim aliba ajanga adoktsü. Kasaji, Tenyartem mapang nunga Anania aser Sapphira natia tenati tenla agütsüba jagi tena mulungjang nung tamajung bilembaji küpdoktsü ta bilem. Ajisüaka, Tsüngremi parnok teka agi agütsüba tenlaji masü saka temulung nung bilembaji dang agi. Asen Tsüngrem ya Temeim Tsüngrem saka ano tetsübuttsüka. Pai asenoki tema tazütsü agi inyakba ya merepranger saka temulungjang nung bilembatem repranger. Asenoki aiben temulungjang nung aibelena bilemaka asen teka agi tenla tajung agütsüba aser mapa tajung inyakba agi aibelena bilembaji taidoker nembangtsütsü amai bilemer. Iba tangatetba jagi asenoki ochimashi len nungi anguba sen nungi tenla tajung agütsür aser temeim mapa inyaker. Ajisüaka, itemji kodanga temeim mapa masütsü aser item tenlatem jagi asen mulungjang nung tai bilembaji shitak makümtsü. Mika tapu 6 nungbo ashir, aseni Tsüngrem anema inyakba asoshi asen mezüng jabaso tenla agütsüba agia Tsüngrem mepeladaktsütettsü. Tsüngremi asen dang nungi tenla masü temeim aketba mulungjang aginür ta Hosea 6:6 nung shia angur.

OLEMSABANG

UNITED HIMALAYAN MISSION (UHM) AJANGA TSÜNGREM MAPA INYAKBA TEMOATSÜ TATSÜKA LEMSATEPER

- N.Toshi Ao Diphupar, Chairman, UHM Board

(Yashi adok nungi...)

Tamalen shisemba ama shisa bulo aser tenokdangba aika liaka kodang iba school tenzüksü osang agütsü (2002 küm) Lower Kg aser Upper Kg nung students 27 aru. Iba ya tesüngmangtsü Tsüngremer sayatenya mapa liasü. Saka shisemba ama parnok anepalutsü ya ata-mata khuret tulo liasü, kechiyong teyazü osang aika prokshi, saka Tsüngremi sayatenya nung kümzüka anir arur.

Tanü UHM Osang

UHM indang tashitsü aser zülutsü aika lir saka tanü kechi tia nung ali ibaji tera lemsateper. (Iba report ya UHM Board meeting July 11 nung amending Missionary agütsüba lir). Yangi tenzüker teimba UCTM graduates lir

A. UHM Evangelists aser parnok yaritem

1. Rev.& Mrs.Thupuzhoi Dozo Missionary (Chakhesang Mission Society)
2. Mr. & Mrs. Hem Bahadur Kami (Naga United Village Baptist Church =NUVBC)
3. M. &Mrs.Kim Bahadur(NUVBC)
4. M.r &Mrs.Bidur MC (NUVBC)
5. Mr. & Mrs.Kushmalal (NUVBC)
6. Mr. & Mrs.Umesh Gautam (NUVBC)
7. Mr. & Mrs. Raghuraj Kewat (NUVBC)
8. Mr.& Mrs.Bim Bahadur (individual)
9. Mr. & Mrs.Alangbhir Sonari (Volunteer)

B. School Team (Class 6 tashi lir)

1. Mr. Thezhoveyi Tetso (NUVBC)
2. Mrs. Anutsulu Tetseo (NUVBC)
3. Mrs.Atsu Dozo (school)
4. Miss Kiran (school)
5. Mrs.Laxmi (school)
6. Mrs.Jully (school)
7. Miss Rinku (school)
8. Mrs.Usha (school)

C. Churches planted with members

1. Aradhana Mandali (Bhangbari-Palpa)-45
2. Maulathar Jyoti church (Mityal)-25
3. Palpayrukshey Bhangya (Nizdi)-30
4. Sinai church (Kshatritari)-95
5. Viyay Nepal church (Prithivi Bosti)-93
6. ChangaiMadali (Barsare)-25
7. Amahawa church (Maharajgani)-46
8. Good shepherd Mission church (Nautanwa)-25
9. Bhaluwang Baptist church (Dang)-87

Total baptized members-471

Associate members-550

House Fellowship -55

D. Mount Hermon Academy

Teaching staff-8

Students enrolment-92

Hindus-73

Muslim-15

Christian-4

Tang teinyak sentong kar yamai lir

Item tesayur aser students ajak school nung sentong ajak nung atener. Tatishitsü kar yamai:

1. Anepdang chapel nung atener aser yangji Laishiba otsü ashir
2. Sunday school nung tanurtem ajak atener
3. Deobar tekülem sentep nung atener

Tang tashi nungbo iba area nung odia reshikangshi mali. Saka asenok sadema sayutsüngia aser sentep agia senütsü memelar. Lisopurtem tamangertem kanga tasü eita sentep akar. Rongsen aser tamang nung asenok teyari kanga nüngdaker. Tsüngremi molungra taküm küm matemdang UHM ajanga revival tajung ka agitsü sentong lir. Anungji amangbapur ajaki akokba ajak nung yariteptsü ayongzüker. Tali jangjaa angatetnera kü den tongteptsü mepisher.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Connecticut nung pastor Tommie Jackson police gari agi tsükset



Rev. Tommie Jackson

July 27, 2023: Bodhbarnü (July 26) Stamford, Connecticut nung pastor ka par ki anasa police gari kati tsüksetogo; arrshi küm 69, Rev. Tommie Jackson ya Rehoboth Fellowship Arogo nung pastor dang masü saka Urban Redevelopment Commission nunga assistant director liasü. Stamford police commissioner, Dorye Jackson kinüngbu, pastor Tommie Jackson par kima shidi agizükba mapang nung arrshi küm 24, police officer, Zachary Lockwood gari tanidak nung phone nung jembia aruba sülen pastor dak tsükoktsü. Stamford Mayor, Police officer jagi

lenmang nung kola meyipba sülen pai Jackson gari lenmang ajanga oa angu, anungji pai Jackson paidoktsü merang saka mepaidokteti pa dak tsükoktsü. Stamford Police Department-i sangdong ka ajanga, "Lenmang ajangdanga alisangji ilonga Stamford Hospital-i anir oa yari saka meküzmükteti asü. Pastor Jackson Connecticut State Police-i iba tatalokba bushisüngdangdar. Mangyimer kibong züngsemtem den onoki tejashi lemsateper aser sarasademtsür," ta metetdaksü. Stamford Mayor, Caroline Simmons-i,

"Rev. Jackson ya Stamford nung alirtem atema tongshi ka liasü aser pai Tsüngrem tenzükba den külemi lokti-a tenzük," ta metetdaksü. Simmons-isa, "Pa ya küm tembar ka, ta ashitsüji ni asoshi akhümket liasü. Pa dak sempet balala, asayamenü aser sasapela liasü," ta ashi. Pastor Jackson kinüngtsü, Dorye Jackson ya Stamford's Board of Police Commissioners nung züngsem lir. Osangbenertem den jembidang lai, police gari nungji 'siren' ola maliasü, siren ola ali asübo la kinüngbui angashir lila, ta ashi.

Uganda nung tetsür kati Khrista agizükba sülen kinüngbui la tepset

Nairobi (Kenya), July 29 (Agencies): Anüdoklen Uganda linük nung tetsür kati Khristan yimsü agizükba agi la kinüngbui la tepsetogo. Arrshi küm 31, Amina Nanfuka, Kampala-i oa medical check-up agiba sülen Bugiri jila nung tekülem sentong nung adentsü atema ao. La kinüngbu arrshi küm 40, Abdullah Waiswa-i pa kinüngtsüi Tenla kidang Khrista agizükogo, ta osang angashiba sülen la tepset, ta Amina'er kinünger kati metetdaksü. June ita nung Amina Nanfuka anogo ter tashi Kampala nung medical treatment agia amongba mapang nung lar kinünger ki ka nung la anenzüka liasü. Lar kinünger jagi 2021 küm nung Khrista agizüka liasü. Amina yangji amongba mapang nung pastor ka arua la atema sarasademja liasü.

Doctor-i la dang ano hopta asem lir ano arung ta ashi. La Kampala nung amongba mapang lar kinünger jagi la den Khrista osangtjung lemsatepa liasü. Osangbener den jembidang Amina'er kinünger jagi, "Ni la den Yisu Khrista tashi ajanga kümzükba indang lemsatep aser lai-a Yisu dak amanga Khristan yimsü agizüknüa liasü. Anungji Kampala nung doctor ajuruba sülen küna Tenla ki kati oa tekülem sentong nung aden," ta ashi. July 8 nü tena Kampala-i meyipa aru aser tasüngnep tekülem sentong nung adenba sülen Amina-i pastor ajuru aser Khrista agizüka liasü aser pastor-i la nem Laishiba ka agütsü. La kinüngbu'er medemer aser kiyonger, Ariko Yahaya-i Amina ket nung Laishiba angu. July 9 nü Amina nikongdang 5:00 ako meta lar kidangi shilang aser la

kinüngbo 8:00 ako meta kidangi arua la den rara. Iba sülen la kinüngbu, Waiswa-i la dak kanga mejungi azük. Kiyongertem adenshiba mapang nung la kinüngbu ki telung nungi adokba sülen ayazüka oadok. Amina mejungi yirur tebang nungi azü adoka anguba sülen la clinic kati anir ao saka doctor-i la tekong nung alenseta sädaktsüogo, ta ashi. Amina'er kinünger jagi, "Kiyonger Ariko Yahaya-i Waiswa dang küna Kampala nung Tenla kidangi aoba osang metetdaksü asütsüa akok," ta ashi. Amina Nanfuka tasü mangji Eyingo yimdak arem aser lar chir asemji lar tsüraburtem den yuja lir. Waiswa'er kibongi 2019 küm Namayingo district kübok Bubanyi yim toktsür Bugiri jilai oa shishilembaba mapa inyaka liasü.

ANO GO ABEN TSÜNGREM DEN

RENEMA LIANG

"Kari menur ama bilemaka Kibubai Pei tenangzükba indang memener; saka shinga mesamadaktsüner saka ajak temulung meyipba dangi arudaktsünüa nenok tsütsü pai talangka aremzüker:" 2 Peter 3:9

Alima ajunga rara (2nd World War) koba alima nung rara tulutiba, nisung jenti asü, rongsen jenti sama aser alima kanga mejungi raksa iba otsü indang zünga meteta lir. Iba raraba mapang nisungtem ammag sangwa memeteti shisabulua, tejenokdak makai tsükchir nungi jenshia senzü. Tanü item ya aseni angashidang oda otsü ka yanglua nisungtem mulungdangtsü asoshi ashirba ama dang bilemer; aji saka iba ya adangji shitak atalokba ka lir. Tanü asen tendak II World War tu tanaben matalokaka, iba mesükba raratem asen meketa lir, aser iba yagi asenok aiben tsübudaktsür aser shisabulur. Anogo ka nungi ka ta tamajungba akümer; süra tanü asenoka koda renema lir?

Peteri Yisu tanaben arutsü asoshi ashibato tiyazü aser marutsü ta nüburtemi jembiba indang II Peter 3: 4 nung shia lir: "Aser ashitsü, Pa tanaben arutsü tenangzükba kong ali?" Yisu Khristai Pa tanaben arutsü indang asenok dang nangzuka lir, saka meimchirtemi tanen maka temenen nung senzür, Pa tanaben yakta marubaji; Pai asenok mesamadaktsüner aser meimba ajanga pai atasar (v. 9).

Kibuba, Na arudang Ne den aotsü ni renema lidi. Amen.

MP nung ketdangsertemi 'nun' akümstsüjangrar tetsür asem apu

July 29, 2023: Madhya Pradesh nung tsüraburtemi child welfare ketdangsertem dang parnok jalatem tangsa ketdangsertemi pua liasü saka par asemji Khristan kibongtem nungi lir. July 26, 2023 nü osangbenertem den jembidang tetsür asem rongnung ka tsürabur, Prakash Baria-i, "Onoki ozü jalatem tangsa chiokdaksüner," ta metetdaksü. July 21, 2023 nü Madhya Pradesh state Commission for Protection of Child Rights nungi ketdangsertemi tetsür asemji pua liasü. Jhabua district nung Ketdangsertemi Catholic school hostel ka mita aoba mapang nung tetsür asemji apu, ta Arogo osang ka ajanga metetdaksü. Tetsür asem rongnung ana class 11 aser ka class 12 nung azünger, aser par asemji 'nun' akümstsü tejangraba liasü, ta Baria-i ashi. Tang tetsür asempronglaji District Child Welfare Committee (CWC) ket nung lir.

Banswara district kübok Jamburi yimdak nungi lir. Baria densema tsüraburtemji Jhabua district-i aoba sülen parnok ketdangser dang, kechiba tsüraburtem nem memetdaksüi tapi agi tanurtemji apu, ta ashishia liasü. Baria-i, "Onok ya tribal nisungtem aser akhi tsürabur mapang nungi onok Khristan liasü. Kechiba nenoki onok chiurnurtem pua ayur," ta asüngdang. Osangbener den jembidang ano tsürabur ka, Samsun Makwana-i, "Nun akümstsüji ozüing alema inyakba mapa ka asü?. Ozü jalatemi paronok nun kümner, ta jembia nung iba nungi kechi timtem ali?" ta asüngdang. Tsüraburtem jagisa, jalatemji mechikra parnok child welfare ketdangsertem anema ken o benoktsü, ta metetdaksü. CWC nung chairman, Ashok Arora-i, state child rights panel team-i tetsür asemji parnok ket nung agütsü; iba hostel jagi telatetbatem anema inyaker, ta ashi. Paisa, "Iba hostel nungi nun akümstsü atema training agütsür asü?," ta asüngdang.

AO OSHI ANGAZÜKDAK:
TANÜ ANGAZÜKTSÜBA OJANG



Tir Yimyim

Rogor

(n) peisasa bilemteta timtemer angati nübo agi yariba (render physical support voluntarily)

* Makokba shirangba agi tanü onok par lui **rogor** ao.

Rogortep

(v) melentepa yaritep (support each other physically)

* Ozü züngartem mapa ajak nung **rogortepa** inyaker.

OLONG PAITEP # 6591

	1	2		3	4	5
6					7	
			8	9		
		10				
11						
			12			
13	14	15				16
17					18	

TIPIEN

- 1. Inyaker ajangtelba
- 3. Bangsemo adokdak
- 6. Shitak mesüi inyak
- 7. Ya mimong nung angur
- 9. Reprangzük
- 10. Tasola
- 11. S _____
- 13. Yagi ajak ashioxtsür
- 15. Ki aokba oset
- 17. Ak shi nung inokba tasen
- 18. Ishika

LANGTSÜNGLEN

- 1. Meshidak
- 2. Tanaben soshir
- 3. Iba anogo
- 4. Meshi
- 5. Yagi mi tsükloker
- 6. Shi tapu ka
- 8. Yagi ayimer saka ozü masü
- 9. Ajokba shiruru ka
- 12. Inyaket
- 14. ___ hi
- 16. Akümüli nungi pilar

OLONG PAITEP # 6590 TELANGZÜBA

TIPIEN :

- 3. Metet, 5. Tarak, 6. Aputak,
- 8. Asaya, 9. Uwa, 10. Anem,
- 11. Ata, 12. Lasa, 13. Ano,
- 14. Prong, 16. Shilem,
- 17. Aginü, 18. Meshi.

LANGTSÜNGLEN :

- 1. Atem, 2. Raksa, 3. Mapa,
- 4. Taküm, 6. Ayaterm,
- 7. Tenüng, 8. Awashi,
- 12. Lisem, 13. Anogo, 14. Peri,
- 15. Azük.



ALOKBA AROGO COUNSELLOR DEN :

Alokba : Sir, ni joko ozü tantsü küna temeim mokonga kümogo.

Counsellor : Kwa koma mokonga akümer?

Alokba : Küna kibong kümlibo ni office nungi shilangdang tantsüi tzü talem züzüka ammer arua atatsü aser ozü azü-i asanga ni agizükli asü, tang joko kümtem süia sodang yabo ozü azüi ang tzü talem ammer atatsü aser tantsüi ang asanga anidaktsü ta asür aja!

Counsellor : Kecha tesasatsü maliato aji, service bo kasa dang likaji koda?

- Lilir : WhatsApp

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo

1. Tenüng :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :

Manipur police-i bank nung auyar nisung 4 apu



Imphal, July 29, 2023

(Agencies): Manipur police Special Investigation Team (SIT) kati State Cooperative Bank (MSCB) Kangpokpi Branch nung auyaba atema nisung pezü puogo.

Parnok ya Lamjalen Chongloi (Lelen), Lengoumang Kipgen (Goumang), Lunminthang Khongsai aser Seiminthang Khongsai nung ta jangjaogo. CCTV footage ka ajanga parnok maitsü putet aser Kangpokpi district nung pei yimtsüngtem nung par pezü apu.

Parnoki July 11 nü bank nungi computer sets 6, Canon printer ka aser CCTV camera hard drive ka auya bener ao. Item oset ajak parnok ket nungi ngutetogo Manipur police-i metetdaksü.

Iba tatalokba atema Additional Superintendent of Police (Law and Order) Tholu Rocky MPS lenisüba kübok SIT ka tenteta bushisüngdangtsü tenzük.

SIT-i bank nungi auyaba ATM cards bushitet aser Senapati o Kangpokpi nung

aliba ATMs nungi sen agizükba putet.

Iba osang nung ajemdaker SIT-i bank balala nungi CCTV footage benden. Idangji bank nung inyaker kati CCTV footage nungi Lamjalen Chongloi jangjatet aser OC Henmingthang Kipgen-i aniba KPI PS team-i pa apu.

Chongloi dang asüngdangya asüdang pai ajak nangzük aser tanüngba nisungtem alidak osang sangoktsü. Iba nung ajemdaker police-i tanüngba nisung asem apu.

Assam MP Kamakhya Tasa-i BJP national secretary inyaksü

Guwahati, July 29, 2023

(Agencies): Bharatiya Janata Party (BJP) nung National Secretary inyaksü atema Assam nungi Rajya Sabha MP Kamakhya Prasad Tasa shimogo.

2024 Lok Sabha elections nung rangloker BJP ktdangsubaren nung temelenshi kar südar.

"Assam nungi MP Kamakhya Tasa dena BJP4India ktdangpur tasentem nem tenüngsang agütsür. Pa

BJP nung National Secretary shimba atema pelar. Narendra Modi lenisüba kübok nenoki linük aser party atema bendanga agüja tenzüktsü amanger" ta Assam CM Himanta Biswa Sarma-i metetdaksü.

Honibarnü BJP-i central office-bearers indang telok tasen ka shimba metetdaksü aser iba nung vice-presidents 13 aser general secretaries 9 dena lir.

BJP-isa MLA aser taoba

Aligarh Muslim University vice-chancellor Tariq Mansoor vice-president ama shim.

Congress lennir tejen AK Antony'er jabaso Anil Antony-i tawa tu BJP nung aden aser pa-a national secretary ama shimogo.

Ketdangpur tasentem shimba mapang Assam Lok Sabha MP Dilip Saikia general secretary mapa nungi anentsü.

Taoba Union minister Radha Mohan Singh-a vice-president menden nungi agienogo.

Manipur Governor Uikey-i Churachandpur relief camp semdang

Imphal, July 29, 2023

(Agencies): Manipur Governor Anusuiya Uikey-i July 29 nü Churachandpur nung relief camp ka semdanga liasü.

Iba mapang lai nübertem den ajurutep aser parnok yaritsü

nangzük.

"Kibong nung züngsem samartem aser rongsen takoksa angurtem nem sorkari teyari agütsütsü. Manipur nung yimjung bener arutsü aser nübertem yaritsü atema ni

akokba tashi inyaksü" ta tanü Governor Uikey-i nangzük.

Churachandpur nung lapoka aliba relief camp nung kibong aika jenoka lir. Parnok ya kin o kin rara ajanga pei talidak toktür aotsüsa akümerterem lir.



Assam police-i July 29, 2023 nü Tinsukia district kübok Mamorani yimtsüng nung tapoktsütem anguba sülen agiba noksa angur. Iba tesem nung PEK 8, detonator ka aser power pack ka den batteries 6 ngutetogo ta Tinsukia Additional SP, Bivas Das-i ashi. Osang angazükba agi telungpur kati August 15 nü IEDs amshitsü tasa atonga liasü ta Das-isa ashi.

SANGDONGER

Lt. Nokennungsang (Sungratsu) Pa jabaso asem dak sendakba lokti aser kija dang kechi ken-o aser sentsüh sa ali, item atema kü khuret kecha mali, item ken-o aser sentsüh atema ni bushia marudaktsüner, kechiaser ni joko parnok den kecha sendaktepba mali.

Sd/-
MASALEPDEN (Sungratsü)
Padumpukhuri Dimapur

Russia-i Dnipro nung apartment block ka aser SBU raksatsü



Ukraine kübok Dnipro yimti nung Russia nung missile agi raksatsüba administrative building ka nung mibenertem mapa inyakba noksa nung angur.

Kyiv, Chiteni/July 29 (Agencies): Ukraine anütoklen Dnipro yimti nung missile agi ki ana dak kongshiba sülen tanur ana densema nisung teku yirua liasü.

BBC team kati ashiba agi, Hokolbarnü nikongtsütsü residential tower block ka indang top floor ajunga raksaja liasü.

Ukraine security services (SBU) indang ki ka dak missile agi kongshiogo, ta tir Volodymyr Zelensky-i ashi. Pai iba tesem amakba ya Russia dak tai tongloktüsügo.

Zelensky-i, ki teraksa nungi mokozü adoka aliba video ka Telegram nung lemsatepa liasü.

Paisa, iba tatalokba sülen pai SBU, interior ministry, emergency services aser local ketdangsurtem jongdak senden ka ayongzüka menogo, ta ashi.

Regional head Serhiy Lysak-i ashiba agi, lendong nung yirurtem rongnung arishi küm 14 aser 17 tain tanur ana densema

liasü, ta ashi. Paisa, parnok kidang temang anepaludar, ta metetdaksü.

Iba tesem ya 20:30 local time (17:30 GMT) meta maka liasü, ajisüaka lendong nung nisung asüba osangbo kecha mali, ta Lysak-isa metetdaksü.

Hokolbar nikongtsütsü amakba densema SBU building ya Russia nungertemi tang agi tasembenbuba makogo, ta Dnipro Mayor Borys Filatov-i ashi.

Ki anaprongla ya timba tazüing liasü, ta pai ashiba den nisung alitsü atema yangluba ki ya tawa yangluzük aser unit tem ayok tenzüker liasü, ta shisem.

Russia-i Hokolbarnü sangdong ka ajanga parnoki Rostov tesem nung Ukraine nung indang missile ana khadangogo, ta ashiba sülen Dnipro yimti ya maka liasü.

Moscow-i ashiba agi, Taganrog yimti nung missile khadanga mapang merang

meru balala pokshiba agi nisung 15 yirua liasü.

Hokolbarnü Russia-i, parnoki Taganrog yimti nung missile ka khadanga liasü, ta ashi. Russian defence ministry-i ashiba agi mezüingbuba S-200 missile ya yimti kübok "residential infrastructure" dak rangloker khaloktsüba liasü.

Mezüingbuba missile khadanga sülen mapang tatsüka dang lir Azov yimti anasa tanabuba S-200 missile khadanga liasü.

Rostov region Governor Vasily Golubev-i ashiba agi, central Taganrog nung "Chekhov Garden" café anasa nisung 15 tashi terara yirua liasü.

Taganrog ya Azov tzyüimkü nung amenoka lir, koba Ukraine den arrtsü nungi km 40 shi pilar lir.

Iba yimti ya Mariupol yimti-i aoba lenmang nung lir, koba Russia-i kanga mejungi raksatsür lir.

US-i Taiwan nem USD million 345 alang military teyari agütsütsü



Washington, Chiteni/July 29 (Agencies): United States-i Taiwan nem maneni teyari agüja USD million 345 alang military teyari agütsütsü sangdongogo.

Teyari agütsüba nung defence articles", military education aser training densema alitsü ta US tir Joe Biden indang administration-i Hokolbarnü sangdong ka ajanga metetdaksü.

White House sangdong ajanga koba amala hadir mesüra equipment agütsütsü iba indang osang tejangja memetdaksü, ajisüaka media outlet balala ajanga ashiba agi, teyari agütsütsü aliba nung air defence systems, prangbong tila indang

injang aser reconnaissance equipment tem densema lir.

Iba osang sangdongba ya Beijing-i aitsüogo, shirnoki nungdak dang süra tashyima amshia Taiwan aser China na tanaben longjemdaksütsü ta shia arudar.

Washington nung Chinese embassy otongdar Liu Pengyu-i sangdong ka ajanga ashiba agi, US-i Taiwan dang prangbong hadirtem ayokba anentsüla aser Taiwan Strait nung ano tensa mejungi kümdaksütsüsa jenjang tasen magitsüla.

US-i Taiwan ya officially bo magizüker, ajisüaka Beijing-i tashyim amshia inyaksangshiba mapang iba asetkong indang

defence ajungkettsütsü atema teyari agüja arudar. China-i tayimtsü aser rongtem amshia Taiwan aiben amokmerena arudar.

Iba ita tetenzüklen China-i, taküm agi tanabenbuba Taiwan meketa military exercise balala ayongzüka agiogo. China-i Taiwan tzyüküm anasai warships aser tayimtsütem yoka liasü.

Washington-i kümtentsünda Taipei nem USD billion aika alang military teyari agüja arudar, kong USD billion 8 alang F-16 fighter jets 66, 2026 küm tashi nungbo agütsütsüba densema lir.

Biden-i Taiwan nem teyari agütsüba aser nüjiso atema nokdakba Tsai Ing-wen administration pusemba atema Washington aser Beijing na tsüingda tesendaktep tamajungba kümogo.

US Congress-i, American military stocks nungi Taiwan nem teyari agütsütsü atema Biden nem temelaba agütsüba sülen tang Washington-i iba teyari agütsütsü asoshi sangdongogo.

PELABA LEMSATEPER



Asür Toshimanen Ozüküm (Yimjenkimong)

Ozü temeim jabaso aser adianu Toshimanen Ozüküm, July 19, 2023 anogo nung iba akümüli wadang nungi asen teyanglur Tsüngremi anir ao. Iba mapang ozü dak malangba temeim aser taochi sayua yaritepertem ajak dang ojalai anir onok adianutem ajaki kanga pelar aser onoki iba temeimji kodanga mamatsü. Tongtibangsa item yimten, arogo aser sensosangertem dang kanga pelaba shisemer :

1. Yimjenkimong yimten yimsüsürtem aser arogo, kitsükina nung alir, anük-apang aser medemsortem,
2. Molungkimong yimten aser Kinungertem,
3. Merangkong Yimten,
4. Asangma yimten, Potir Zünga
5. Tuli Town Yimjenkimong Senso Telongjem, Lanur Telongjem
6. Waromung Yimten, Arogo aser kinungertem.

Onoki nenok nem meyipa agütsütsü kecha maka saka nenok temeim aser taochi tulu ozü dang sayuba yari Tsüngrem nungi temoatsü ngudakjangma, aji ozü tamang sarasasadem.

-Temeim Oja aser adianutem.

EU, African Union-i Niger nung coup lenirtem nongshir

Niamey, Chiteni/July 29 (Agencies): Iba hopta military-i sorkar atsüingba sülen European Union-i ashiba agi, parnoki Niger den security dak sendakba nung kecha tesendaktep mayutsü aser senotsü teyari magütsütsü telemetba agiogo.

Kasa mapang nung African Union-ia sorkar atsüingba military lenirtem dang parnok indang barrack temi meyipa aotsü ayongzüko.

Niger indang presidential guard commander General Abdourahmane Tchiani-i Hokolbarnü, pa transitional sorkar tekolak asütsü ta sangdonga liasü. Pai aniba sepaitemi Bodhbarnü tir Mohamed Bazoum sota ayuba sülen pai Hokolbarnü iba osang ya sangdonga liasü.

"Senotsü teyari agüja aliba anenadokba den bendenloksema security dak sendakba nung tesendaktep kechisa ali item ajakji mapang telatet ka makai tang nungi anena atar," ta EU foreign policy chief Josep Borrell-i Honibarnü sangdong ka ajanga metetdaksü.

Parnok indang website ajanga ashiba agi, EU-i 2021 nungi 2024 tsüingda Niger nung governance, education aser sustainable growth atema parnok indang budget nungi euro million 503 agütsütsü lemzütsür liasü.

Borrell-isa kasa sangdong ajanga, Bazoum ya temzüing ozüing kübok Niger indang tir lir ta ashiba den pa tangsa tang chiochtsü khangogo aser tir aser par kibong dak langka danga atalokra iba khuretji coup lenirtemi abentsü ta metetdaksü.

Borrell-isa, West Africa indang regional bloc-i tenokdangba balala agütsütsüba densema kechisa telemetba agidir aji nongita yaritsü atema EU renema lir ta ashi.

Kasa mapang nung United States' nungi lenirtemia sepaitemi atsüingtoker aliba Niger lenir masetshi pusemba metetdaksüogo, aser pa pua ayurtem dang linük nung democracy inyakyim tanaben mebenokra USD million aika teyari agütsütsü telemetba agir aliba ya koma asüjar mejangja akümtsü, ta ashi.

US Secretary of State Antony Blinken-i, Bazoum dang phone ajanga, pa atsüingtokba sülen taoba mapang ama temzüing ozüing shidak benoktsü atema Washington-i jenjang tapet agitsü ta shiogo, ta state department-i Hokolbarnü metetdaksü.

Blinken-isa, Niger nung dang masü saka West Africa nung security jenjang tajungba kümdaksütsü asoshi jenjang tapet agiba atema Bazoum tenüingsanga jembiogo.

Iba hopta Blinken-i Bazoum dang, par linük nem Washington-i teyari agütsü aliba ya democratic governance aser rule of law aser human rights koda akümtsübur iba dak keta lir ta ashiba sülen tang pai iba olen lemsatepa liasü.

Hokolbarnü state television ajanga arishi küm 62 tain General Tchiani-i, linük sama aotsü ana nung aliba nokdangtsü atema pai sorkar atsüingogo, ta metetdaksü.

Maneni African Union-ia, Niger nung military dang parnok indang barrack temi meyipa aotsü aser anogo 15 tsüingda temzüing ozüing ajanga kümtetba sorkar amenoktsü takhangba ka agütsüogo.

AU indang Peace and Security Council-i, "military personnel tem dang tangsa tang parnok indang barrack temi meyipa aotsü aser anogo 15 tsüingda constitutional authority tanaben amenokshitsü akhanger," ta Hokolbarnü senden ka amenba sülen metetdakja liasü. Niger nung military-i sorkar atsüingba dak sendakba nung sensak asemtsü atema AU Hokolbarnü senden ka mena liasü.

AU-isa, nüburtemi shimba sorkar atsüingtokba ya aitsüogo aser Africa nung military-i sorkar aika atsüingyonga aoba indang shisabulua bilemba lemsatepogo.

2021 küma March ita Tchiani-i anir sorkar atsüingtsü meranga liasü. Parnoki Bazoum tir mapa agizüktsü atema tenangzüktepba magi tsüingda anogo ishika jelia presidential palace atsüingtsü merangdanga liasü.

Niger ya Libya, Chad aser Nigeria densema Africa linük teneti meketbenger lir aser US aser France nati iba linük ya iba tesem nung security dak sendakba nung amokmeren balala azioktsü atema kanga tongtibang partner ka ta züingsir.

West Africa nung linüktem rongnung Niger-i US nungi military teyari timba agizüker. 2012 küm nungi tenzüka parnoki teyari USD million 500 shi agizükogo.

Maneni Niger nung anüölen aliba linüktem nung sepa 2000 dak tema amenoka lir. Bendanger sepaitem ya timba US aser France nungi lir.

BAM-i anogo 10 nü Mkg nung 'free boxing coaching camp' ayongzük



BAM-i ayongba free boxing coaching camp takok ngua tembanger külen Mokochung DC & MDSC tir, Thsuvisie Poji NCS den shilem agirtem aser tayongertem külemi tangokba noksa nung angur. Mokochung, 29th July, 2023

Mokochung, 29th July (TYO): Boxing Association Mokochung (BAM)-i ayongzük July 19 nungi July 29 tashi angati boxing sayuba coaching camp sentong ka yangi Multi-Purpose Indoor Stadium, Mokochung nung katsüogo.

Anogo 10 nü akaba coaching sentong nung tetsür tebur meyoktepa lanur 164-i takok ngua shilem agi. Zünga asem – arishi 5-8, 9-12 aser 13-16 (tetsür-tebur balala) ta küma lemsar tesayuba agütsü. Iba camp nung tesayurtemji - Master Bendangaküm, Master

Mongsen Longkumer, Coach Nokinyanger, Coach Akum Imchen aser Coach Tongpangnokcha par pungu den ano teyariteper kar liasü.

Iba coaching camp tembangba sentong nung Mokochung Deputy Commissioner aser Mokochung District Sports Council (MDSC) Tir, Thsuvisie Poji NCS-i jembidang, sorkari nungi teyari kecha melika aser asen lima saisabong tsütsü nungdakbatem peria meliaka, nükla tulu yur anogo 10 tashi BAM-i iba camp takok ngua

ayongba asoshi pelaba den ibai lanurtem asoshi tajungshiba tulu asütsü aser iba yagi tarutsü tesangwa sayur, ta metetdaksü.

Mokochung district nungi nüngtugu boxer adoka pei district, state aser linük atema tenüng tajung bener arutsütsü nükla yur asayatsü merangtsüla ta pai ajungshia liasü. Nüngtugu boxer akümtsü asoshi tejangraba den temulungtetba ayutsüla aser tsüraburtemia iba nungji nungittsü asoshi paisa shisem.

Coaching camp nung adenertemi parnoki angazükbatem ia sayu.

Chhetri, Sandhu na Asian Games team nung züngoka mali

Chiteni/July 29, 2023 (Agencies): Hangzhou nung asayatsü aliba Asain Games nung India tetsür aser tebur team shilem agitsü atema Sports Ministry-i temelaba agütsüba sülen Indian football team captain Sunil Chhetri, Sandesh Jhinghan aser Gurpreet Singh Sandhu nunger team nung züngoksemtsü imla liasü.

Ajisüaka osang ajanga ashiba agi, Asian Games organizers dangi yokba list nung Chhetri, Sandhu aser Jhinghan nunger tenüng mali.

Asian Games nung tebur football asaya ya U-23 dang lir,

ajisüaka arishi küm 23 tema alir asayar asem team nung anioka asayatsü melar. Asian Games nung Chhetri-i anir India team asayatsü imla liasü aser pa den centre-back Jhinghan aser goalie Gurpreet nata team nung anioktsü imla liasü, ajisüaka Times of India osang ka ajanga ashiba agi, asayamung ayonger dangi yokba list nung par asem tenüng mali.

Asian Games ya China nung taküm asayatsü renema lir. Asayar tem tenüng benoktsü atema tatembangbuba anogoji July 15 nü liasü aser iba asayamung atema asayar 22

tenüng asayamung ayongertem dangi yokogo.

AIFF tir Kalyan Chaubey-i Asian Games organiser tem dang par asem agizüktsü asoshi mepeshia asüngdangogo aser Asiad organisers committee dangia kasa shiti ka yokogo, ta osang ajanga metetdaksü.

Chaubey-i ashiba agi, Sports ministry ketdangsurtem den AIFF senden amenba mapang asayar tem list nung Chhetri, Jhinghan aser Gurpreet nunger tenüng züngoksema maliasü. Iba ken o jangja akümba sülen pai organizer tem den ken o ashishitepa liasü.

8buba Nagaland Shooting Championship osang



Dimapur, Chiteni/July 29 (TYO): Aries Rifle And Pistol Shooting Academy, Khelo India Centre, Dimapur-i ayongzükba 8buba Nagaland Shooting Championship 2023 July 24 nungi 28 tashi Aries Sports Complex Shooting Ranges, Bamunpukhuri-A, Dimapur nung kanga takok ngua asayaogo.

Iba asayamung ya Nagaland Rifle Association-i achaayanga asaya liasü.

Ajak senteper iba asayamung nung Dimapur, Kohima, Mokochung, Chümuokedima aser Peren nungi tebur 43 aser tetsür 21 ta asayar 64-i events 31 nung shilem agia liasü.

Asayamung nungsa Shillong, Meghalaya nung August 20 nungi 27 tashi asayatsü aliba 10buba North East Zone Shooting Championship 2023 nung shilem agitsü atema asayar 29 qualify süa liasü.

Asayamung nung Dimapur district-i gold medal 14, silver 13 aser Bronze medal 8 ngua parnok temaba jenjang nung liasü aser parnok sülen Kohima team-i gold 8, silver 3 aser Bronze medal 2 angu, Mokochung team-i gold 7, silver 6 aser bronze 4, Chümuokedima team-i gold 3, silver 2 aser bronze 1 aser, Peren team-i bronze medal 1 ngua liasü.

Japan Open: Lakshya Sen semifinal nung tsükogo

Chiteni/July 29, 2023 (Agencies): Honibarnü Japan Open tebur kija asaya semifinal nung Lakshya Sen-i Jonatan Christie den kanga meranga asaya ajisüaka takok monguteti tsükogo. Tena tsüngda minute 68 asaya liasü.

Asaya nung Sen-i mezüngbuba asaya makok ajisüaka tanabuba asaya nung asendenshir kanga junga asaya aser decider asayatsüsa aküm, ajisüaka tasembuba set nung imlaba ama masayateti Christie nem iba asaya 21-15, 13-21, 21-16 agi kokdakja liasü.

Tebur kija asaya ranking nung Christie ya tang jenjang 9buba nung lir aser tang tashi nung tena tsüngda asaya khen khen kokogo. Christie final nung Denmark nunger asayar Viktor Axelsen mesüra Japan nunger

asayar Kodai Nairoka den asayatsü.

Asaya mezüngbuba set nung arishi küm 21 tain Sen ya interval tashi nung 11-9 agi tejakdang liasü, ajisüaka Jonatan-i meyipier kanga junga asaya 21-15 agi asaya akok. Mezüngbuba set nung break sülen Sen-i point pezü dang nguteta liasü.

Tanabuba set nung Sen-i point trok atonga nguteta pai asaya 21-13 agi ayong ayonga akok aser iba ajanga tena tsüngda deciding asayatsüsa aküm.

Ajisüaka tatembangbuba set nung Sen atema Christie ya kanga tashi tait liasü aser pai Sen nem maongka magütsü asaya kokatok.

Iba asaya nung Sen tsükba sülen Japan Open nung India nunger ajak tsükatokogo.

World Cup: Sweden aser France nati takok angu



Sweden tsür Rebecka Blomqvist-i lar team atema goal pongububa idaktsüba sülen Madelen Janogy aser Sofia Jakobsson na den pelatepba noksa nung angur.

Chiteni/July 29, 2023 (Agencies): Tang asaya aliba France-i goal 2-1 agi koka par tetsür World Cup nung Honibarnü Sweden-i goal 5-0 agi Italy koka knockout stage tongtetogo.

Honibarnü iba asaya akokba sülen Sweden team-a Spain aser Japan na den knockout rounds tongtetogo.

Asaya nung Arsenal defender Amanda Ilestedt-i goal ana idaktsü aser Fridolina Rolfo, Stina Blackstenius aser Rebecka Blomqvist nungeria goal kaka idakja liasü.

Asaya tetenzüklenbo Italy-i asaya azüoka asaya ajisüaka corner metsüba mapang parnoki anüng nung Sweden team den toktepba masayatet aser World Cup nung tang tamajungtiba tamakok nguogo.

Sweden goalkeeper Zecira Musovic-i asaya tenzüker mezüngbuba minute nung forward Sofia Cantore-i metsüba ball ka kanga junga nokdang aser iba sülen minute 17buba nunga Sofia-i metsüba ball sa kanga junga nokdanga liasü.

Iba asaya mekokaka Italy team last 16-i aitsü atema timla mesamai lir, ajisüaka Bodhbarnü South Africa den tatembangbuba asaya asayatsü aliba ya akoktsü nüngdaker.

Kasa asayamung nung

France aser Brazil na asaya France-i goal 2-1 agi koka par telok nung parnok temaba jenjangi tuogo.

Asaya ya group stage asaya ka memesüki kanga toktepba asaya liasü. Iba asaya France team-i taoba asaya dang nungi kanga agi tajungba asaya tenzüker aser parnoki ball azüoka asaya Brazil team nem maongka aika magütsü liasü.

Asaya mezüngbuba shilem nung France team-i kanga kara asayaba den passing kanga junga süa asayaba Brazil team-i memenepe liasü.

Team ana tsüngda kanga toktepba asaya arur striker Eugenie Le Sommer-i France atema mezüngbuba goal idakja parnok tejakdang toktsü aser asaya mezüngbuba shilem ya goal ka ya dang agütsür tembanga liasü.

Asaya tanabuba shilem nung Brazil team-ia asendenshir kanga junga asaya tenzüker, aser parnok rongnungi asaya Debinha-i goal ka idakja team ana tsüngda goal kasasa aküm.

Team ana tsüngda maneni tasa balala amshia kanga toktepba asaya aruba sülen minute 83buba nung asayar tejen Wendie Renard-i Brazil indang goal nung ball tajung ka tongokja parnoki asaya koka liasü.

BILEMDANGANG

“Nai nisung ka koma lidaktsüner yamaji lia sayuang.”